

1 **Lego, il termagl che vegn vendì il pli bler avant Nadal**

2 "L'emprim less jau alura avrir il pac da legos." Uschia poi tunar en bleras famiglias cun
3 uffants pitschens la vigilia da Nadal suenter avair chantà chanzuns – u probablamain gia
4 avant. Gia dapi duas u trais generaziuns vegnan mess legos sut il pignol. Las cifras
5 pudessan bunamain starmentar: Pressapauc 180 milliardas tocs da lego èn vegnids
6 producids enfin l'onn 1996. 300 milliuns uffants e creschids fan u han ina giada fatg termagls
7 cun legos. In statisticher ha calculà ch'i vegn giugà ca. tschintg milliardas uras ad onn cun
8 legos sin quest mund.

9 *Lain u plastic?*

10 "Plastic na vegn mai a stgatschar ils buns e vegls giugarets da lain." Quai ha in schurnalist
11 scrit ils onns quaranta, suenter ch'el aveva visità la fabrica da legos a Billund en Danemarc.
12 Da quel temp produciva la fabrica anc dapli termagls da lain che da materia artificizala. Il
13 schurnalist da lura faschess probablamain egls gronds, sch'el vesess co ch'ils uffants
14 refusan oz ils giugarets da lain ch'ils geniturs dattan ad els sperond ch'era ina materia
15 natirala possia conquistar ils cors da lur figls e figlias.

16 *L'emprim na marschavi betg*

17 Il 1949 produciva la fabrica da legos radund 200 differents termagls. Da quest temp ha il
18 manaschi cumenzà cun la producziun e la vendita dals blocs da lego. I deva duas differentas
19 sorts, il bloc cun otg bots e quel cun quatter bots. L'entusiassem dals commerziants per
20 quests blocs n'era a l'entschatta betg fitg grond. La vendita ha sulettamain funcziunà,
21 perquai che la fabrica garantiva che las stizuns possian restituir ils blocs en cas ch'els
22 restian sin las curunas. Bleras stgatlas cun blocs èn vegnidas enavos. Ma in'entschatta era
23 fatga. Da quest temp pudev'ins duvrar ils blocs be per construir paraids u chasas. Els na
24 tegnevan betg ensemen sch'els vegnivan derschids u stevan cun il chau, respectivamain ils
25 nuvs engiu. Il bloc era chavortg.

26 *La soluziun: In pitschen bischen*

27 Il 1954 han ils blocs da lego cuntanschi be ina svieuta modesta da tschintg pertschient da la
28 firma da termagls en Danemarc. Il bloc è vegni sviluppà: La finamira era da cuntanscher ina
29 megliera stabilitad. Il 1958 ha Godtfred Kirk Christiansen schlià il problem. El ha inventà ils

30 pitschens bischens en l'intern dal bloc. Quels strenschan ensemen ils nuvs dal bloc giusut,
31 ed i tegna. Questa invenziun ha dà la patentà da basa per lego. Cun ils bischens ha
32 cumenzà il success mundial.

33 Per ch'ils singuls elements gïajan precisamain in en l'auter, ston ins producir els a moda fitg
34 precisa - per maximal in milliavel milimeter dastgan els sa differenziar in da l'auter per ch'ils
35 singuls craps van in en l'auter. Quai è uschè pauc ch'ins na po betg vesair quai ad egl.

36 *Expansiun e blera reclama en il satg da rument*

37 Oz vegnan ils blocs da lego vendids en 130 pajais en pli che 60'000 stizuns. Ils lieus da
38 fabricaziun èn il Danemarc, la Svizra, ils Stadis Unids, la Brasilia e la Corea. Il 1997
39 occupava la societad da la gruppa Lego 9'400 collavuradors, bunamain la mesadad da quels
40 en il Danemarc. En ina broschura da lego da quel onn pon ins leger: "Nossa finamira è ch'il
41 logo da Lego daventia quest onn la pli ferma marca dal mund tar famiglias ed uffants." Ma tut
42 quai n'interessescha probablamain pauc u nagut la mattatscha ed il mattatsch cura ch'els
43 avran il pac da Nadal. Els vegnan dentant segiramain a s'interessar per il carnet da reclama
44 en la stgatla da legos. Lez cuntegna fotografias da models da lego anc blier pli bels che quel
45 ch'els han gist chattà en lur pac.

46 Il num 'Lego' deriva dal linguatg danais. "Leg godt" signifitgescha tant sco "gioga bain".
47 Per onn vegnan producids passa 30 milliardas tocs da lego. Durant ils 50 onns da lur
48 producziun dat quai total 400 milliardas (400'000'000'000!) - da quai betg main che quatter
49 milliardas figuradas da lego. Quai tanschess per scumparter a mintga uman sin quest mund 75
50 tocs da lego.

Suttascripziun candidata / candidat:

Lieu / data:

Rumantsch grischun

Puncts total: 100

Durada: 90 minutas

| | | | |
|---------------------------|----|-------------------------|----|
| A. Chapientscha dal text: | 25 | B. Produenziun da text: | 25 |
| C. Vocabulari: | 20 | D. Grammatica: | 30 |

Vegn emplenì dals magisters che curregian

| Correctura | data: | visum: | puncts: |
|------------------------------------|-------|--------|---------|
| A. Chapientscha dal text | | | |
| B. Produenziun da text | | | |
| C. Vocabulari | | | |
| D. Grammatica | | | |
| puncts cuntanschids total ► | | | |

| Controlla | data: | visum: | puncts: |
|------------------------------------|-------|--------|---------|
| A. Chapientscha dal text | | | |
| B. Produenziun da text | | | |
| C. Vocabulari | | | |
| D. Grammatica | | | |
| puncts cuntanschids total ► | | | |

| Controlla posteriura | data: | visum: | puncts: |
|------------------------------------|-------|--------|---------|
| A. Chapientscha dal text | | | |
| B. Produenziun da text | | | |
| C. Vocabulari | | | |
| D. Grammatica | | | |
| puncts cuntanschids total ► | | | |

1. Chapientscha dal text

1.1. Dumondas pertutgant il text

Respunda uschè exact sco pussaivel a las suandantas dumondas che stattan en connex cun il text che ti has legì.

Per mintga punct ston ti chattar e nudar in argument!

*Adatg! Las respostas ston vegnir formuladas cun **frاسas entiras!***

1. Pertge han ils legos surpassà ils termagls da lain? Tge èn ils avantatgs dals legos?

| | |
|-----|--|
| 2 p | |
|-----|--|

2. Pertge quintav'ins a l'entschatta ch'ils legos n'hajan nagina schanza envers ils auters giugarets?

| | |
|-----|--|
| 3 p | |
|-----|--|

3. Pertge na tegnevan ils emprims legos betg bain ensemen? Explitgescha **cun agens plets**.

| | |
|-----|--|
| 2 p | |
|-----|--|

| |
|--|
| |
|--|

4. Legos vend'ins ozendi....
a) en quants pajais?
b) sin quants continents?

| | |
|-----|--|
| 2 p | |
|-----|--|

5. Tenor il text ha la firma Lego tscherts plans per il futur.
a) Tge finamira vul ella cuntanscher ?
b) Tar tgi vul ella cuntanscher questa finamira?

| | |
|-----|--|
| 2 p | |
|-----|--|

6. Tge chatt'ins adina en il pac sper ils legos sco tals?

| | |
|-----|--|
| 1 p | |
|-----|--|

7. Tge èn varts problematicas en connex cun la producziun da lego?

| | |
|-----|--|
| 2 p | |
|-----|--|

| |
|--|
| |
|--|

8. Il davos suttitel (lingia 36) sa cloma: "Expansiun e blera reclama en il satg da rument." I sa tracta qua d'ina remartga critica. Tge pudess quest titel signifitgar?

| | |
|-----|--|
| 2 p | |
|-----|--|

9. En tge pajais sa chatta la centrala principala da la firma Lego?

| | |
|-----|--|
| 1 p | |
|-----|--|

10. Constattan las suandantas pretensiuns tenor il text che ti has legì? Inditgescha schebain las singulas pretensiuns qua sut èn gistas u falladas.

| | | gist | fallà |
|----|---|--------------------------|--------------------------|
| a) | Gia dapi tschintg generaziuns datti legos sut il pignol da Nadal. | <input type="checkbox"/> | <input type="checkbox"/> |
| b) | Dapli che la mesadad dals lavurers che lavuran tar Lego lavuran en Corea. | <input type="checkbox"/> | <input type="checkbox"/> |
| c) | Legos vegnan producids dapi 60 onns. | <input type="checkbox"/> | <input type="checkbox"/> |
| d) | Legos vegnan producids er en Svizra. | <input type="checkbox"/> | <input type="checkbox"/> |
| e) | Il pled danais 'leg' signifitgescha per rumantsch 'colliar'. | <input type="checkbox"/> | <input type="checkbox"/> |
| f) | Dapi l'onn 1954 tegnan ils legos bain ensemen. | <input type="checkbox"/> | <input type="checkbox"/> |
| g) | La Corea sa chatta en l'America. | <input type="checkbox"/> | <input type="checkbox"/> |
| h) | La cifra 'diesch milliardas' ha 10 nullas. | <input type="checkbox"/> | <input type="checkbox"/> |

| | |
|-----|--|
| 8 p | |
|-----|--|

| | |
|-----------------------------------|--|
| Chapientscha dal text 25 p | |
|-----------------------------------|--|

| |
|--|
| |
|--|

2. Producciun da text

Mes termagl preferì

Segir possedas ti a chasa differentes giugarets pli gronds e pli pitschens. Raquinta d'in termagl che ha (u aveva pli baud) ina impurtanza fitg speziala per tai. Inditgescha pertge che ti has (u avevas) ina relaziun talmain ferma cun quel giugaret.

- *Scriva in text cun almain **200 plets** en frاسas entiras e bain formuladas!*
- *Guarda da duvrar in stgazi da plets varià e da betg repeter trasora ils medems plets!*
- *Structurescha bain il text.*
- *Metta in **agen titel** che va bain cun il text!*

| |
|--|
| |
|--|

| | |
|--|-------------|
| Quants plets has ti duvrà? Inditgescha qua il dumber. | _____ plets |
|--|-------------|

| | |
|-----------------------|--|
| cuntegn (max. 10 p) | |
| stil (max. 5 p) | |
| grammatica (max. 5 p) | |
| ortografia (max. 5 p) | |
| TOTAL: 25 p | |

| | |
|--|--|
|  Producziun da text 25 p | |
|--|--|

3. Vocabulari

I suondan varsaquantas dumondas da vocabulari.

3.1. Sinonims

*Inditgescha mintgamai **in sinonim (mo in pled!)** per ils suandants plects ord il text, uschia ch'il text resta correct! (exempel: martgà = fiera, magher = satig!)*

1. (lingia 5) starmentar _____
2. (lingia 13) probablamain _____
3. (lingia 19) entusiassem _____
4. (lingia 21) garantir _____
5. (lingia 39) occupar _____

| | |
|-----|--|
| 5 p | |
|-----|--|

3.2. Antonims

*Numna mintgamai **in antonim (mo in pled!)** per ils plects inditgads. (exempel: grond ≠ pitschen, ciad ≠ vitg; betg lubi: grond ≠ betg grond)*

1. (lingia 12) artificial _____
2. (lingia 14) refusar _____
3. (lingia 17) radund _____
4. (lingia 29) stabilitad _____
5. (lingia 32) mundial _____

| | |
|-----|--|
| 5 p | |
|-----|--|

| |
|--|
| |
|--|

3.3. Explicaziun da peds

Explitgescha cun frasar entiras e correctas las suandantas expressiuns che cumparan en il text.

| | | | |
|----|-------------|-------------|-------------------------|
| 1. | (lingia 4) | generaziun | <hr/> <hr/> <hr/> <hr/> |
| 2. | (lingia 13) | schurnalist | <hr/> <hr/> <hr/> <hr/> |
| 3. | (lingia 15) | conquistar | <hr/> <hr/> <hr/> <hr/> |
| 4. | (lingia 19) | commerziant | <hr/> <hr/> <hr/> <hr/> |
| 5. | (lingia 31) | patenta | <hr/> <hr/> <hr/> <hr/> |

| | |
|------|--|
| 10 p | |
|------|--|

| | |
|--|--|
|  Vocabulari 20 p | |
|--|--|

| |
|--|
| |
|--|

4. Grammatica

I suondan varsaquants pensums da grammatica.

4.1. Activ e passiv

Guarda l'exempel e transpona questas frastas da l'activ en il passiv e cuntrari. Fa attenziun al temp.

Exempel:

activ: Il giat maglia la mieur.

passiv: La mieur vegn magliada dal giat.

1. activ: Reto contempla la statua.

passiv: _____

2. activ: Seraina ha examinà las locomotivas.

passiv: _____

3. activ: _____

passiv: In mail vegn mangià da tai.

4. activ: Il president ha beneventà ils votants.

passiv: _____

5. activ: Il tat legeva la gasetta avant gentar.

passiv: _____

6. activ: Ils amis al han tradi.

passiv: _____

| | |
|-----|--|
| 6 p | |
|-----|--|

| |
|--|
| |
|--|

4.2. Singular - plural ordinari - plural collectiv

Cumplettescha la tabella. Guarda ils exempels en las singulas colonnas.

| singular | plural ordinari | plural collectiv |
|------------|-----------------|------------------|
| | | la maila |
| il gnerv | | |
| | ils bratschs | |
| la mustga | | |
| | ils clients | |
| la chaglia | | |
| | | la signuria |
| | ils mirs | |

| | |
|-----|--|
| 8 p | |
|-----|--|

| |
|--|
| |
|--|

4.3. Furmaziun dal verb

Chatta il verb adattà per las expressiuns dadas! Dovra mo in pled.

Exempel:

far public - publitgar

| Expressiun | Verb |
|--------------------|------|
| far ina adattaziun | |
| far ina fotografia | |
| far bel | |
| far in segn | |
| far grond | |
| far chaud | |
| far simpel | |
| far la differenza | |
| far ina collecziun | |
| far ina revoluziun | |
| far ina conclusiun | |

11 p

| |
|--|
| |
|--|

4.4. Ortografia

Sutvart chattas ti ina glista cun expressiuns. Varsaquantas da quellas expressiuns èn scrittas endretg, autras èn scrittas fauss.

Fa ina crusch (x), sche l'expressiun è scritta endretg. Sche l'expressiun è scritta fauss, stos ti scriver ella endretg da vart dretga.

| | | Correct? | Curregia qua las expressiuns ch'èn scrittas fauss! |
|-----|-----------------|--------------------------|--|
| 1. | la tus | <input type="checkbox"/> | |
| 2. | jau cur | <input type="checkbox"/> | |
| 3. | els guarden | <input type="checkbox"/> | |
| 4. | il chastè | <input type="checkbox"/> | |
| 5. | il bastimend | <input type="checkbox"/> | |
| 6. | la difficultad | <input type="checkbox"/> | |
| 7. | ir alla staziun | <input type="checkbox"/> | |
| 8. | els havevan | <input type="checkbox"/> | |
| 9. | Nus essan stà. | <input type="checkbox"/> | |
| 10. | l'informaziun | <input type="checkbox"/> | |

10p : 2 = 5p



Grammatica 30 p

| |
|--|
| |
|--|